

Ada golongan cuba gagalkan pelajar2 Melayu — Dr.M

U.M. - 6 JUL 1978

ALOR SETAR 5 Julai — Timbalan Perdana Menteri Datuk Sri Dr. Mahathir Mohamad hari ini mengingatkan rakyat tentang adanya golongan tertentu yang tidak bertanggungjawab cuba menggagalkan para pelajar Melayu di bidang pelajaran.

Berucap merasmikan Sekolah Kebangsaan Padang Terap, Kuala Nerang, kira-kira 32 batu dari sini, beliau berkata, mereka itu telah menyatakan adalah haram bagi pelajar Islam menuntut di bidang perubatan.

Katanya, kerajaan amat kesal terhadap sikap mereka itu yang cuba menggagalkan rancangan bagi menambahkan lagi bilangan doktor di kalangan orang-orang Melayu.

Tambah beliau, mereka itu juga bukan sahaja cuba menggagalkan pelajar-pelajar di bidang perubatan tetapi juga di bidang kejuruteraan.

Beliau berkata disebabkan dakyah itu, ramai juga para pelajar Melayu yang menuntut di seberang laut gagal dalam peperiksaan.

"Kebanyakan mereka itu belajar atas biasiswa kerajaan dan ini amatlah merugikan kerajaan," katanya.

Menurut beliau, sekarang hanya terdapat seramai 170 orang doktor Melayu dari jumlah 2,700 orang doktor rakyat Malaysia yang berkhidmat di negara ini.

Memandangkan jumlah itu kecil, kerajaan sentiasa berusaha menambahkan lagi bilangan orang Melayu untuk menjadi doktor bagi menampung keperluan masyarakat Melayu, khasnya bagi mereka yang tinggal di kawasan luar bandar, tambah beliau.

Datuk Sri Dr. Mahathir berkata golongan itu juga tidak mahu kaum wanita mempelajari bidang perubatan kerana mereka terdedah kepada perkara yang haram.

Tambah beliau, sikap seperti itu akan hanya mematikan keazaman generasi muda yang ingin melanjutkan pelajaran mereka di bidang perubatan.

Beliau berkata ibu bapa hendaklah mengawasi

supaya anak-anak mereka tidak dipengaruhi oleh golongan itu.

Beliau memberitahu kerajaan telah pun menguntukkan sejumlah \$2,300 juta tahun ini untuk melaksana dan memajukan lagi rancangan pelajaran di negara ini.

Tambah beliau, peruntukan itu adalah besar jika dibandingkan dengan peruntukan lain yang disediakan oleh kerajaan.

Pelajaran katanya adalah penting bagi merobah nasib rakyat di negara ini selaras dengan perkembangan dan kemajuan.

Datuk Sri Dr. Mahathir berkata dalam kempen pilihanraya ini terdapat juga golongan tertentu yang meracuni fikiran anak-anak muda dengan cara menyuruh mereka melakukan sesuatu perkara yang tidak diingini.

Menurut beliau, selain dari itu mereka juga disuruh menggunakan perkataan "kafir", dengan sewenang-wenangnya terhadap golongan yang berlainan fahaman politik.

Katanya, hasutan yang dilakukan oleh mereka itu akan hanya menimbulkan perselisihan fahaman di kalangan orang Melayu yang beragama Islam.

Katanya, perkataan kafir mengkafir tidak boleh dilakukan sewenang-wenangnya kerana ia menjejaskan kesucian agama Islam yang dianuti oleh orang-orang Melayu.

Beliau memberi amaran terhadap golongan itu supaya jangan terus menghasut anak-anak muda khasnya murid-murid sekolah menyalahkan konsep Islam.

Terdahulu, Menteri Besar Kedah Datuk Sri Syed Ahmad Shahabuddin ketika berucap berkata kerajaan akan terus mengadakan segala kemudahan bagi kepentingan penduduk luar bandar.

Beliau yang juga calon Barisan Nasional bagi kerusi Parlimen Padang Terap menambah rakyat hendaklah menggunakan kemudahan yang telah disediakan oleh kerajaan di tempat mereka.